



Arkivsak-dok. 18/00114-1 Arkivkode.  
Saksbehandler Johan Ailo Mattias Kalstad

Saksgang Møtedato  
Allaskuvlastivra 2015-2019

## **OVDANÁHTTINŠIEHTADUSA EVTTOHUS**

### **Evttohuvvon mearrádus:**

Allaskuvlastivra dohkkeha direktevrra árvaluvvon ovdánahttinšiehtadusevttohusa. Son oažju fápmudusa sáddet evttohusa Máhttodepartementii daiguin rievdadusaiguin mat čoahkkimis ovdanbohte.

## **Saksframstilling:**

Ovdánahttinšiehtadus lea oðða strategalaš ortnet man Máhttodepartemeanta lea ásahan, ja mii galgá leat reaidun doarjut stivrra ja departemeantta olahit sohppojuvvon bajit dási mihtuid. Šiehtadus boahtá lassin muðui rámmastivremii ja gulahallamii mii Máhttodepartemeanttas lea Sámi allaskuvlla hárrái. Lea arjkke deattohuvvon ahte ovdánahttinmihtut eai galgga boahtit strategalaš mihtomeriid sadjái, ja ahte ortnet ii galgga mielddisbuktit ahte departemeanta iežas seaguha detáljaide. Ovdánahttinmihtut galget baicca doarjut fágalaš profiillaid ovddideami ja leat stivrii veahkkin vuoruhit fáttáid.

Máhttodepartemeanta lea earret eará gaskkustan čuovvovaš ulbmiliid oðða ortnegiin:

- Joksat bajit dási kvalitehtamihtuid
- Čielgaseabbo ásahusprofiillaid (iešvuoðaid) ovdánahttit
- Buoret bargojuogu ovddidit Norgga universitehtaid ja allaskuvllaaid gaskkas

Dán rádjái leat logi universitehta ja allaskuvlla juo dahkan ovdánahttinšiehtadusaid mat leat oassin sin juolludanreivviin. Ásahusat leat šiehtadusaid dahkan 2016s ja 2017s, ja dán vuoru leat oktanuppelot ásahusa vel báhcan mat 2018s galget šiehtadusa dahkat.

Šiehtadus galgá bistit gitta 2022 rádjái. Nu lea dehálaš ahte dán barggu oktavuoðas hutká realisttalaš mihtuid mat seammás leat dan maðe váddása duohken ahte movttiidit ovdáneapmái. Ovdanihttinmihtuid galgá sáhttit čáðahit (operašunaliseret) ja daid olaheami galgá sáhttit duoðaštit. Dan dihte galget mihtuid mielde čuovvut konkrehta oassemihtut ja paramehterat maid galgá sáhttit kvalitatiivva dehe kvantitatiivva vugiiguin mihtidit. Vuordimis čadnojuvvo ruhtadeapmi mihtuid olaheapmái, muhto makkár ruhtadanmodealla šaddá ii leat vuos čielggas. Lea dehálaš fuomášit ahte mihtuid mielde ii čuovu bušeahttalassáneapmi, ja lea ásahusa duohken ieš vuoruhit resurssaid daidda.

## **Stivrra vuosstaš evttohus**

Máhttodepartemeanta lea bivdán stivrra evttohit ovdánahttinmihtuid dakka manjnel stivračoahkkima njukčamánu 7. beaivvi. Nu sáddejuvvo evttohus njukčamánu 8. beaivvi. Departemeanta lea bivdán ásahusaid evttohit sullii golbma mihtu. Eai berre leat eambbo go njeallje mihtu.

Direktevras lea leamaš unnán áigi ráhkkanahittit evttohusa dan rájes go proseassa čielggai ovdalaš juovllaaid. Allaskuvla sáddii álggahanseminárii bovdehusa skábmamánu loahpas mii dollui oððajagimánu 16. beaivvi. Doppe čielggadii departemeanta vuordámušaid ja proseassa. Direktevra ja rektor oasálasttiiga.

Unnán áiggi geažil lea direktevra eanaš gulahallan joðihangottiin ja sis viežjan neavvagiid. Dasa lassin lea ságastallan ášši birra fágaserviiguin ja lea vel bargiid gulahallančoahkkimis dan birra muitalan.

Evttohusa vuolggasadji lea arjkke Sámi allaskuvlla strategijaplána 2017-2021, man bargit leat leamaš mielde hábmeme. Evttohuvvon ovdánahttinmihtut leat vižón oalle njuolga strategijas

nugo doppe ovdanbohtet. Muhtin heiveheamit leat dahkkon vai formáhttii heivejit. Oassemihtuid ja paramehteriid ges lea ferten eanet heivehit ja konkretiseret, dan geažil go strategijaplána mihtut leat alit ja generealla dásis. Evttohus maid čuovvu eará stivrendokumeanttaid maid stivra lea mearridan ja mat vulget strategijas, nugo bargoveahkaplána, kvalitehtaraporta ja jahkeplána.

Evttohuvvon mihtut leat válljejuvvon dainna eavttuin ahte daid galgá leat realistalaš olahit šiehtaduságodagas, muhto galget seammás leat dehálaččat Sámi allaskuvlla iešvuodžaid ja vuoruhemiid hárrái. Dat deattuhit hástalusaid ja mihtuid mat leat ovdanboahtán namuhuvvon stivrendokumeanttain.

Stivra ferte leat gearggus ruhtadeami vuoruhit mihtuid olaheami olis. Dan geažil ii leat direkterva evttohan mihtuid mat ovdamearkka dihte mielddisbuktet ođđa fálaldagaid (omd ođđa oahpuid) ásaheami, muhto lea dihtomielalaš leamaš dan hárrái ahte daid galgá sáhttit joksat dálá resurssaiguin. Stivra ferte aŋkke leat dihtomielalaš dan hárrái ahte mihtuid čađaheapmi sáhttá gálibidit eará resurssaid, sihke fága ja háldahusa bealde. Omd sáhttá internašunaliseren gálibidit ahte ferte vuoruhit ruđaid bidjat omd internašunaliserenkonsulentii, enjelasgielat diehtojuohkimii jna.

### **Viidaset proseassa**

Máhttodepartemeanta lea bovden ásahuaid čoahkkimii cuonjománu 11. beaivvi, gos besset ságastallat nubbi nuppi evttohusa birra. Dohko vuolgiba rektor ja direkterva. Dasto šaddá gulahallan stivrra ja Máhttodepartemeantta gaskkas etáhtastivrenčoahkkimis. Dat lea lea bidjon miesselémánu 28. beaivái, muhto universitehta- ja allaskuvlarádi representašuvdnačoahkkima geažil ferte ođđa dáhton gávdnot.

Máhttodepartemeanta sádde iežas oainnuid Sámi allaskuvlla evttohusa hárrái sullii geassemánu gaskamuttus. Dasto šaddá ođđa gulahallan stivrra ja Máhttodepartemeantta gaskkas čakčamánu, ja allaskuvla beassá dalle sáddet ođastuvvon evttohusa.

Mihttomearri lea proseassain geargat skábmamánu nu ahte šiehtadus šaddá oassin Sámi allaskuvlla juolludanreivves.